

編號 4 號

【甘蔗下个蟬仔】羅紫云原作

屋脊該墩白甘蔗，種幾下年了蓋大墩，剝核又會再綻筍，繼續煞猛生啊青柳柳仔，長目多汁，清甜好食。

每年大體對五月開始，日日到臨晝邊，就會有一大陣著等青衫、蓋靚蓋得人惜、頭大尾尖翼長个草蟬，細細仔像手指尾恁大隻仔，黏在這長長、青色个甘蔗葉下煞力牯叫，像在該啦歌哩曲樣仔，一等鬧熱。佢等總係唱等：「揸揸揸啲¹——揸揸揸啲——」清亮个歌聲，一直到下晝兩點零正會煞棚，完全無喊瘡。

草蟬下班，嫲牯蟬²跔等上棚。毋過，嫲牯蟬係黏在白甘蔗脊該墩榮榮个苦棟樹頂。佢算係最大隻个蟬仔，圓身著等一身烏色个西裝蓋亮線，大聲唱等佢等个愛戀歌：「蟬³——蟬蟬蟬！蟬——蟬蟬蟬！」佢等都背等一臺自家製造个放送機，該聲音放送啊盡遠都聽得著。佢心情好个時節，就阿腦佢等唱歌仔蓋好聽，心情毋好時就會試著佢等吵耳塞鼻了。但係一想著佢等看著這個世界，單淨短短幾日仔，就一等佩服佢等恁好膽、煞猛打拚个精

神，來完成唯一愛做个事情——傳宗接代，該就無麼个好怨嘆，也會原諒佢等恁呢盡命牯緊叫了。

在這鬧熱个時節，佢兜張凳仔恬恬坐在甘蔗脊詳細聽，還會發現佢等毋係儘採唱个哦，曉得照順序、有條理，成時獨唱、成時合唱，像有人指揮樣仔。聲音有清亮、低沉、有時大有時細，發出个聲無多共樣，有个過尖有个過溫柔。其實，蟬仔有蓋多種，有一年、三年、五年、十三年、十七年，長年都屏在地泥下，麼个都看毋著，淨培養破土个熱情；在多年个等待中，同地泥底下个能量變做歌聲，拚出重重包圍，就係為著這短短幾日个自由。

佢心肝肚緊恸：這墩甘蔗無掖肥，毋知係因為聽了蟬仔熱情清亮个歌聲，正緊生緊高緊榮咩？嘎佢等，乜愛像蟬仔恁知足，知恩圖報，每日歡喜暢樂，這一生人就豐富精彩了！

¹ 揸揸揸啲：音 iam iam iam i；草蟬的叫聲。借字。

² 嫲牯蟬：音 maˊ guˊ samˊ；此指臺灣熊蟬。

³ 蟬：音 samˊ；此指臺灣熊蟬的鳴叫聲。

編號 8 號

【崁下該頭拉杌樹】徐秀英原作

歌在鄉下，屋脣種幾頭仔番樣¹樹、牛眼仔、拉杌仔係蓋平常个，一到打子个季節，管佢有熟也無熟，係有食得个東西，細人仔絕對無放佢煞；毋過係吵著睡當晝个叔公叔婆大聲逐，該下晝就無戲好唱了。

佢屋下就在伙房个最尾析，崎仔溜啊下就係砌崁。崁下个圳溝係細人仔熱天个天堂，洗身仔、屎魚仔、捉蝦公、釣蛤蟆蚴仔，想得著个空頭，麼个都搵得著來搞。該頭拉杌樹就對崁下个石壁頂哼出來。

阿嬤蓋好食這頭个黃拉杌，見看著拉杌仔會食得該駁仔，佢就會怙等杖仔行兼來同佢這兜細啞仔講，青拉杌食了會屙硬屎，愛等佢黃了正好食。細人仔嘴項應講好，一群豺狗哪，哪管得著²佢等該張嘴，幾雙賤手扯得著个，全部都摘來塞牙縫了，除了生啊忒樹頂摘毋著个。阿爸就會拿竹篙極叉去夾下來，過硬个佢會自家食核，過熟个佢會放啊米缸裡背，翕加兩日正拿去阿嬤間項。無牙齒个阿嬤，糜啊糜仔，面項滿足个笑容，到這下佢都還

記得。

該頭拉杌樹頂，輒常就會有青絲仔飛來做竇。青絲仔毋驚人，佢等在樹下搞家啦飯仔，佢在樹頂高啾啾滾飛來飛去。細人仔雖然番綻，毋過從來毋識去撞過厥竇。過盤擊个會跋上石壁去算看啊，竇項有生幾多粒卵。一駁仔後，樹頂又加加幾隻得人惜个細鳥仔，就恁呢生生不息。

樹頂高也有膨尾鼠跳上跌落，還有共樣毋驚人个山狗太、狗嫲蛇趁上趁下。膨尾鼠尾仔絨絨，蓋得人惜，屋下食伸个果子也係果仁、果皮放到樹底下，佢等會輪等跳過來食。咕嚕嚕个目珠仁迂迂轉，就驚人來搶食个樣仔，實在還生趣。山狗太、狗嫲蛇就無恁得人惜了。因為厥皮膚有保護色，分樹梗抑係燥葉仔壅到共下个時節，一無注意就會分佢嚇著，故所佢盡惱山狗太。

恁多年過去了，崁下該頭拉杌樹早就無在了。毋過，該童年个回憶，哪久都恁香甜个放在佢个心肝肚。

¹ 番樣：音 fan' son；芒果。

² 管得著：音 gon` ded` diau`；管得住。